



## SIUMUT INATSISARTUNI ILAASORTAATITAT / LANDSTINGSGRUPPEN

04. januar 2010

UPA 2011/65

Inatsisartut suleriaasianni § 33 naapertorlugu matumuuna aaliangiffigisassatut siunnersuummik imaatumik saqqummiussissaanga.

**Inatsisartut Naalakkersuisullu pillugit Inatsisartut inatsisaat nr. 26, 18. November 2010-meersup taamatuttaaq Kalaallit Nunaanni Inatsisartunut qinersisarneq pillugu Inatsisartut inatsisaat nr. 9, 31. oktober 1996-imeersoq pillugu Naalakkersuisut allannguutissamik UKA2011-imi saqqummiusseqqullugit peqquneqarnissaannik, taamaalilluni inatsisartuni ilaasortat ullumikkut 31-iusut qinersiviup tulliata aallartinnerani 27-iinnangortinneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq, Malik Berthelsen Siumut)

### **Tunngavilersuut:**

Qinigaafimmi matumani inatsisartuni ilaasortatut nutaatut piffissami tassani inissisimareerlunga takusinnaangorpara Nunatsinni Inatsisartunut ilaasortat taamak amerlatiginissatsinnut pissutissaqanngikkaluartugut. Naatsumik oqaatigalugu isumaqarpunga innutaasut amerlassusaat kiisalu nunatsinni qinersiviup ataasiinaanera eqqarsaatigalugu “amerlavallaaluatsiartugut”, taamaattumik isumaqarpunga nunatsinni inuinnaat naalakkersueqataanerannut ajortumik kinguneqanngitsumik qinikkat sisamanik ikilineqarsinnaasut, taamaalillunilu pisorat aningaasartuutaat annikillisinneqarsinnaasut. Isumaqarpunga ilaasortat 27-it maannakkut ilaasortat 31-iusut suliassaat pisussaaffiilu ajornqauteqanngitsumik naammassisinnaagaat inuinnaat naalakkersueqataanerannut ajoqutaanngitsumik.

Unneqqarillunga oqassaguma isertuunnagu oqaatigissavara ukiumut qaammatini 12-inniit taamaallaat qaammatit 4-5 -it ilungersunartorsiorfiusinnaasarmata. Taamatut oqarnera imatut paasineqassanngilaq Inatsisartutut sulineq piumallerlunilu pimoorusiffiunanilu suliffiusutut. Kisianni aamma tamatta nalunngilarput Inatsisartuni ilaasortaaneq ukioq kaajallallugu ima ulapiffiutiginnitsoq allaat inatsisartuunitta saniatigut allamik suliffeqarsinnaanerput periarfissaalluni. Soorunami Inatsisartut katersuunnersisa nalaanni pissutsit allaaneruserput.

Pingaartutulli eqqaamaneqassaaq uagut maanga atorfirmut immitsinnut ivertinnikuunnginnatta "naassaangitsumillu" maani issiasussaanaata. Kikkulluunniimmi inatsisartunngorusuttut piumasaqaatinik naammassinissimasut uagutsitulli atorfeqalerusuttut sassarsinnaatitaapput.

Katersuuttarnivut ilaatigut ilungersunalaarsinnaasaraluartut nammineq misigisakka tunngavigalugit ataatsimiinnitsinni siunnersuutitut partiiniit oqaaseqartartut ataatsimiititalianilu sulisarnivut eqqarsaatigalugit isumaqarpunga qinikkat 31-iniit 27-inut ikilineqaraluarpata sinneruttunut suliasanut angummassinaanginnermik artorsarnerulernermillu kinguneqarnaviangitsoq.

Taamaattoqarnera Kattusseqatigiit Partiiata ataatsimik Atassutikkullu siusinnerusukkut 3-inik maannakkullu 2-innik ilaasortallit uppersareerpaat taamak ikitsigigaluarlutik sulianut angummassinnaasarnertik, naak ilaatigut ulapittarneri nersunartaraluartut. Tassunag atatillugu eqqaangitsoorusunngilara allattoqarfivut ukiuni kingullerni aningaasatigut aaqquissuusaannermikkullu nukittorsarneqarnikummata taamaalilluta inatsisartuni ilaasortat ataasiakkaarluta suliamut tunngasutilinnik pitsaanerusumik siornatigorniit siunersorneqarsinnaangornikuulluta. Taamaattumik naliliisinaanera naapertorlugu isumaqarpunga inatsisartuni qinigaaneq tamakkiisumik isigalugu oqinnerulernikuusoq ilaasortanillu ikinnerusunit naammassineqarsinnaasoq. Taassuma saniatigut teknikkigit periarfissaavoq partiinut tapiissutisarnepup naleqqussarneqarsinnaanera taamaalilluni partiit politikikkut suliniarnerannut allanguutaassanani.

Inatsisartuni ilaasortat ikilisinneqarnerisigut partiit sinnerlugit qinikkat tunngaviumik allannortinneqarnaviangillat soorluttaaq qinersinerup kingorna pissaanerup agguataarsimaneranik allannortit-  
sisoqarnaviangitsoq, tassami qinersinerup inernerata qinersisartut taasinerisigut inatsisartut qanoq inissitsiterneqassanersut aalajangertarpaat inatsisartunut ilaasortaasinnaasut amerlassusaat aallaaviuneq ajorluni.

Pissusissamisoorsinnaangilaq kommunit allannortiternerqarsimanerat atuutilersinneqaqqammersoq kommuninilu ilaasortanik ikilisisinissamik siunertaqarsimasoq ilaatigut inatsisartunut allannuutimik kinguneqarsimangimmat. Inatsisartut eqqaasillakka nunaqarfinni aqutsisut 170-iniit 106-inut ikilisinneqarnikuusut. Soorluttaaq kommunini siulersuisut 168-iniit 72-iinnangotinneqarnikuusut, kommunit eqqarsaatigalugit affai sinnerlugit ikilineqarnikuullutik. Siumut isumaqarpoq kommunit iluarsartuunneqarsimanerat pitsaasoq kommuninilu siulersuisut suleroqisut sulilluaqisullu isiginngit-  
suusaassallugit assersuutigalugillu inissisimaannarsinnaangitsugut.

### **Siunnersuutip aningaasatigut kingunissai**

Siunnersuut pillugu isumaqatigiissinnaagutta taamaalillutalu Inatsisartuni ilaasortat sisamanik ikilillugit Inatsisartut aningaasarsiaat kisimik eqqarsaatigalugit ukiumut kr. 2 mio. sipaarutigineqartalissa-  
galuarput – malugalugu angalanernut – ineqartinneqartarnermullu taakkunungalu tunngasut aningaasartuutit ilanngunnagit.

Tamatta ilisimavarput nunatta karsia aningaasatigut inissisimanera imaannaangitsoq, taamaattumik isumaqarpunga taamaalilluni Inatsisartut sipaaruteqarfiginearneri amma pissusissamisoortoq inatsisartutigit inuiaqatigiinnut sullissinermik ajorseriaataasussaangitsoq.

Siunnersuutip aningaasatigut kingunissai marloqiusannorlugit avinneqassapput.

1. Inatsisip allangortillugu suliarineqarnerani nalunaaquttap akunnerani sulianut aningaasartuut (mandetime) tassani naatsorsueriaaseq ukiumut suliarisinnaasap naatsorsorneqarnera kr. 500.000 - iusoq aallaaviussalluni (årsværk) AC-p sulisinneqarnerani, inatsisit allangortinneqarnissaannut naatsorsuutaavoq annetunerpaamik 1/12 AC ukiumut atorneqassasoq.
2. Inatsisit allangortinneqarnerani inatsisip nutserneqarneranut annikittuinnarmik aningaasartuutaanissaa naatsorsuutigineqarpoq.

Aningaasartuutissat siunnersuutip suliarineqarnerani allaffissornikkut aningaasaliissutaasimasut Naalakkersuisoqarfip attuumassuteqartup tullerriaarisarnerup nalinginnaasup iluanni suliarineqassaaq, siunnersuutip allangutissaata annikissusaa eqqarsaatigalugu ajornartorsiutaasussaangilaq.

Taassuma saniatigut allaffissornikkut inuiaqatigiinnullu annertunerusumik aningaasartuutanissaa naatsorsuutigineqarsinnaangilaq taamaattorli Inatsisartut ikilisinneqarnerisigut aningaasartuutitigut assigiingittutitigut sipaarutissat pissallutik:

1. Inatsisartut sisamanik ikilisinneqarneranni ilaasortat sisamat
  - a. aningasarsiaat,
  - b. angalasarnernut aningaasartuutaasartut tassani ilaallutik
    - i. ineqartinneqarnermut,
    - ii. ullormusianut kiisalu nerisqartinneqartarnermut (pisariaqartillugu pisusaaffiit naammassineqarnissaanni)
2. Inatsisartoqarfimmit Namminersorlutillu Oqartussanit Inatsisartut sullinneqarneranni allaffissornikkut aningaasartuutit appartinneqarsinnaapput.

Taamaallilunga nunarput pillugu sapiissuseqarluta namminissarsiornata aalajangernissarput innersuullugu Inatsisartuni tunngaviusumik pissanganartumillu oqallisigineqarnissaa sassaalliutigaara.